



*Jumat, 25 Maret 2022*

**Ogen: Masmur 3:4-6**



**Gedang Berngi Ikalawli Tuhan**



Ampang-ampang, e me sada alat/perkakas si mereken perlindungan man banta. Adi bas perang si jadi ampang-ampangta e me baju besi, topi waja, sepatu perang ras perisai. Adi bas rumah ampang-ampangta tarum rumah ras dinding gelah ula kena angin, abu, las matawari entah udan. Tupung kita erdalan nahe ku inganta erdahin, si jadi ampang-ampanta topi entah payung. Ampang-ampang e mereken keamanan ras keselamatan.

Raja Daud i bas ngalaken musuh-musuhna, igejapkenna maka Tuhan jadi ampang-ampangna. Tuhan si mereken keamanan ras kemenangen man bana. Ieteh Daud gegehna, lao ia ngasup naluken anakna Absalom si nguda denga. Ia pe labo ngasup natap anakna e di kune terluka i bas perang. Bage me penggejapen sekalak bapa tupung erperang ras anakna e. E me erbahansa latih kal akap Daud.

Bas latih ukurna e, latih ka kulana guna erperang igejapna Dibata si nampati ia. Dibata jadi ampang-ampangna, si mereken perlindungan man bana seh maka la ia ikenai serangen musuh. Dibata arah lebena tupung erperang, e maka tetap kal ukurna, la ipediat Dibata ia talu ibahan anakna Absalom. Dibata ras ia, Dibata temanna. Penggejapen Daud labo tupung perang saja ia isampati Tuhan tapi tupung ia tunduh pe ikawaliNa.

Moria si ikelengi Tuhan, kira-kira kai nge si erbahansa maka mesera matata tunduh enggo pe mbages berngi? Banci saja lit aru ate, kebiaren, entah lit persoalen si lenga terdungi. Wari enda petetap ukurta sabab Dibata katawari paksa pe ras kita. Tupung erdahi kita isampatina, i bas ngalaken perbeben ibereNa kita gegeh, tupung kita tunduh ikawaliNa, kai nari nge sierbahansa aru ateta? Bagi Daud, tetaplah kita erpengendes man baNa segedang geluhta.



*[The main body of the page is a large, blank white area with a wavy top edge, intended for writing.]*